



KEMENTERIAN PERALIHAN TENAGA
DAN TRANSFORMASI AIR

KENYATAAN MEDIA

PENYERTAAN MALAYSIA DALAM FORUM AIR DUNIA KALI KE-10 2024 BALI, 18-21 MEI 2024

PUTRAJAYA, 17 MEI 2024 - Timbalan Perdana Menteri merangkap Menteri Peralihan Tenaga dan Transformasi Air, YAB Dato' Sri Haji Fadillah Haji Yusof akan mengetuai delegasi Malaysia ke Forum Air Dunia kali ke-10 di Bali bermula 18 hingga 21 Mei 2024, atas jemputan Presiden Republik Indonesia, Presiden Joko Widodo.

Forum Air Dunia atau *The World Water Forum* (WWF) yang diadakan setiap tiga (3) tahun dianjurkan bersama oleh Majlis Air Dunia (WWC) dan negara tuan rumah, bertujuan untuk memupuk hubungan kerjasama global dan menggalakkan tindakan dalam mengenalpasti isu-isu terkini berkaitan pengurusan air melalui penyelesaian bersepadu.

Penyertaan Malaysia dalam Forum ini juga akan melibatkan Mesyuarat Peringkat Tertinggi yang diketuai oleh Indonesia, bertujuan untuk meneroka penyelesaian inovatif terhadap cabaran berkaitan air berdasarkan tema forum, Air untuk Kemakmuran Bersama. Delegasi Malaysia dijangka mengadakan pertemuan dua hala dengan (1) Presiden Joko Widodo, Presiden Indonesia, (2) Luhut Binsar Pandjaitan, Menteri Koordinator Bidang Kemaritiman dan Investasi, (3) Setiausaha Konvensyen Air dan pihak-pihak berkaitan yang lain.

Pertemuan tersebut akan membincangkan mengenai kemajuan hubungan dua hala, khususnya kerjasama pada masa hadapan dan usaha kolaboratif untuk meningkatkan kemampuan air, berkongsi penyelesaian inovatif untuk menangani isu-isu berkaitan air di rantau ini serta secara global.

Forum ini dijangka mengukuhkan komitmen Malaysia untuk memastikan penggunaan air yang mampan, keselamatan bekalan air dan mewujudkan peluang ekonomi. Malaysia melalui Kementerian Peralihan Tenaga dan Transformasi Air akan memberi tumpuan kepada penyelesaian inovatif untuk menangani cabaran air yang wujud, seperti perubahan corak hujan dan fenomena cuaca melampau.

KEMENTERIAN PERALIHAN TENAGA DAN TRANSFORMASI AIR
17 MEI 2024